

Es lou Pople nostre que canounisè...

■ Es en l'an 1104 que neisseguè dins la famiho Bournarèu, à Mountèu, un drole qu'èro tant poulit que ié diguèron Gènt :

*«Es Mountèu qu'es ta patrio,
Siés nascu vers vounge-cènt,
Siés tant bèu que ta famiho
T'a douna lou noum de Gènt»*,

escriguè l'abat Payan, curat de Sant-Deidié.

Soun paire èro bouié, un rusticaire dóu champ. Sa maire se disié Imberto. Tóuti dous abaliguèron soun fiéu dins la religioun. Lèu, vers si douge an, ajudè soun paire au champ. Avien un troupeloun de vaco que menavo paise dins li palun e sus li garrigo vesino. Tre que li bèstio s'achaumavon, n'aproufichavo pèr dire la bono paraulo i pastrihoun e àutri pichot cambarado que rambaïavo à soun entour. Lou vèspre, maugrat lou lassige de la journado de travai, amavo de s'adouna à la preguiero e à la meditacioun. Avian deja aqui uno bono grano de sant.

E zòu! dins lou Ricavèu...

A-n-aquelo epoco, dins li tèms de secaresso, lou pople de Mountèu avien l'us d'ana demanda la plueio à l'arcange sant Rafèu, qu'avié sa capello sus li garrigo. En arrivant, fasien li preguiero counvengudo pèr faire plóure, pièi, s'acò marchavo pas, prenien lou bust dóu sant e zòu! dins l'aigo dóu Ricavèu, pichoto roubino que passo toucant sa capello. Se cresien que lou sant arcange, estènt tout coulanta, devié bagna lis autre, amor que l'avien bagna éu.

Aquéli soubro de religioun pagano agradavon pas à Gènt, que diguè au mounde :

«Se voulès de plueio, fasès penitènci; se noun la fasès, plóura pas».

Li Mountelen se n'en trufèron e countunièron si tradicioun. Vesènt acò, Gènt agantè lou retra de l'arcange e l'embreniguè en milo moussèu en clamant :

*«Pople de Mountèu, plóura plus avans
qu'agues fa penitènci».*

Mau-countènt, segur, li menaire dóu roumavage lou faguèron engabioula tres jour, e quand menè paise si vaco, es à cop de caïau que si coumpan de la vèio l'acoumpagnèron.

A Mountèu, an lou bras

Decidè alor de quita Mountèu. Un sèr, liogo de s'ana empaia, agantè sa biasso, destaquè li dos vaco siéuno que soun paire l'avié douna, ié carguè dessus quàuquis óutis, un araire, un rastèu, uno plano, un voulame, e lou vaqui parti, l'aguïado en man.

Sant Gènt

patroun de la Prouvènço



Estatuo de sant Gènt à Mountèu

Pèr Bernat DESCHAMPS

Uno legèndo dis que, coume partié, sa maire lou vouguè reteni pèr lou bras e que lou bras ié restè dintre li man. Coumprenènt la voulounta divino, elo alor lou boutè dins un rode ounourable e grand fuguè soun estounamen, l'endeman, de plus lou trouva.

Leva miraclosamen, Diéu ansin l'avié rendu à Gènt. Es amor d'acò que se dis dempièi : «A Mountèu an lou bras».

Tres an de tèms, pas un degout d'aigo toubè sus lou terraire mountelen, secarous e crema pèr l'uscle dóu soulèu.

Mai vaqui qu'un jour un loup arribè que se rounsè sus uno di dos vaco de Gènt e la devouriguè. Mai Gènt s'esfraiè pas, coumandè à la bèstio de veni à si pèd ié demanda perdoun. Elo, tout-d'un-tèms, óubeiguè. Gènt ié boutè lou cabèstre au còu, coume un agnèu se leissè encoulassa e miechouro après, l'atalavo à coustat de l'autro vaco pèr lou faire laura.

Gènt, éu, s'èro assousta dins la mountagno, à tres-quart de lègo dóu Bausset. l'avié destousca, dins lou valoun dóu grand bos, uno meno de baumo, soubro d'un vièi mounastié cassianisto. lé dreissè un autar, se faguè uno litocho d'erbo seco e s'istalè dins lou silènci e lou reculimen. Se nourrisié dóu la de si vaco e di fru de la terro. Faturavo e samenavo pièi lou pichot tenamen qu'avié chausi. Si dos vaco i'èron uno ajudo precioso e si coumpagno de travai. Passavo enfin en preguiero lou rèsto de soun tèms.

Lou miracle dóu loup

Mai vaqui pamens qu'un jour qu'èro justamen apensamenti dins la preguiero, un loup arribè que se rounsè sus uno di dos vaco e la devouriguè. Gènt atrovè lou loup la gulo ensaunouido e l'iue lusènt coume un carboun de fiò. Mai s'esfraiè pas, coumandè à la bèstio de veni à si pèd ié demanda perdoun. Elo, tout-d'un-tèms, óubeiguè. Gènt ié boutè lou cabèstre au còu, coume un agnèu se leissè encoulassa e miechouro après, l'atalavo à coustat de l'autro vaco pèr lou faire laura.

Lou miracle di font


Dins lou meme tèms, à Mountèu, la secado batié soun plen. Dins lou murmur publi, coumençavo de se dire qu'èro lou punimen d'agué fa fugi, pèr meichantige, lou pichot Gènt.

Adounc, tóuti s'acourdèron de dire que falié demanda soun perdoun. Mai degun, meme sa maire, sabié mounte avié parti. Se dis qu'es en pregant Nosto-Damo de Santa à Carpentras qu'Imberto aguè couneissènço dóu camin que menavo à soun fiéu. Après un vouiage alassant vers lou Bausset e dins si bos, l'atrovè en trin de laura emé soun atalage dóu loup e de la vaco.

Passa li joio dóu revèire, lou supliquè de tourna à Mountèu, mounte avien besoun d'éu. Mai avans que de parti, demandè de béure, qu'aclapado dóu camin, uno set terriblo la devourissié. Mai dins aquéu desert, ges d'aigo. Coume èron pèr faire? Divinamen ispira, lou sant touquè lou roucas de si dous det e dos font subran, l'uno d'aigo, l'autro de vin, sourgentèron. Gènt pièi agoutè la font dóu vin e leissè raia aquelo de l'aigo.

Lou miracle de la plueio

Aguènt pourgi i paure dóu Bausset soun maigre bèn, rendu liberta au loup, que pamens lou se-guiguè, e douna sa vaco à sa maire, Gènt s'en-



La sourso miraclouso dóu Bausset

draiè pèr Mountèu. lé fuguè aculi dins l'estrambord, au brand di campano. La ciéuta entiero ié courreguè à l'endavans e tóuti se rescountrèron vers la capello de sant Rafèu. Gènt tombè d'ageinouiouon pèr uno preguiero talo que li sant soulet n'en sabon faire, pièi se gandiguè la proucessioun dins un tour de Mountèu en esperant la plueio. Èro pas acaba qu'aquesto toubavo à gros degout, adusènt, tourna, la fourtuno dóu païs.

L'ermitan dóu Bausset

Mai lou mounde es ansin que quouro a plus besoun de vous, vous óublido. A la fin d'Avoust, pèr la voto de sant Jan Degoulàssi, l'usage vengu di Rouman voulié que se chausiguèsse un rèi de la fèsto, carreja sus un càrri que retrasié lou de Venus o d'Apouloun. Davans éli, se fasien tóuti li foulié poussiblo e ié rendien tóuti lis ounour. Bèn segur, à Gènt, acò l'agradè pas e lou faguè assaupre. Un cop de mai, fuguè pas escouta e d'ùni meme ausèron ié leva la man dessus. Maucoura, decidè mai de s'enana.


S'entournè au Bausset, mai pèr ié mena, aqeste cop, uno vido countemplativo d'ermitan, se nourrisènt simplamen de fru e de racino. Dins l'espèr de la mort, cavè éu-meme soun cros. Fin finalo, lou june e la penitènci aguèron resoun d'éu. Un jour pièi, tant èro feble, s'alounguè dins soun cros e d'à cha pau s'amoussè coume un calèu. Ero lou 16 de Mai de 1127. Avié que 23 an. Mountèu vendra ié demanda perdoun e lou sant cors restara espasa cènt an dins soun toubèu, à la veneracioun de tóuti.

• *Fin pajo seguènto*

Sant Gènt, patron de la Prouvènço

Istòri de la Vau-Santo (Ermitage de Sant-Gènt)

- **Vers 1131.** Se bastis, proche lou toumbèu, uno capeleto dedicado au sant, à l'endré d'un ancian culte pagan.
- **1140.** Estènt deja trop pichoto pèr reçaupre lou mounde, uno grand capello la ramplaço. Fuguè tambèn basti un mounastié de beneditin.
- **1251.** Se dis que d'Albigés passon dins la Vau-Santo e derouïsson en partido la capello e lou mounastié. Lis osso dóu sant, aclapado souto de peirasso, soun mai o mens degaiado. Devié pu-lèu èstre de bando de bregand, que pèr lou ve-rai lis Albigés soun jamai vengu en Vaucluso. Li beneditin enfugi, un ermitan prenguè la seguïdo.
- **1264.** **Clemènt IV** acordo d'indulgènci i vesitaire de la capello dóu Bausset. Sara segui pèr d'àutri papo.
- **1633.** **Jan Fauconnier**, gari di fèbre pèr sant **Gènt**, planto caviho, pèr la fin de si jour, proche soun toumbèu, dins un pichot oustau que bastis.
- **1636.** L'avesque de Carpentras aprovo la devoucioun au sant. **Gènt** es un sant dóu pople. Lou «*grand sant*», coume dison à Mountèu, sara jamai canounisa pèr la Glèiso, mai soun culte es entourisa.
- **1652.** Li relicle dóu sant soun mena dins la glèiso parrouquialo dóu Bausset.
- **1670.** Creacioun de la *Counfrarié de Sant-Gènt* dins la parròqui dóu Bausset.
- **1680.** A quàuqui mètre de la grand capello, coustrucioun de la capello dóu toumbèu, aubourado sus li rouïno d'un proumier ouratòri.
- **1693.** Pèr assousta prèire e roumiéu, **Antòni Fontaine** bastis l'Ermitage de Sant-Gènt, que se vèi vuei encaro, emé jardin e font aboundouso.
- **1696.** Li relicle soun plaça dins un bèu relicari de bos daura fa di man de **Pèire Bernus**, l'escultaire de Mazan.
- **1725.** L'avesque de Carpentras permet de porta l'estatuo e li relicle dóu sant dins li proucesioun que se fan à l'Ermitage.
- **1771.** Dous tros di relicle dóu sant soun douna à la glèiso de Mountèu.
- **1773.** Vesito de sant **Benezet Labre**, lou patron de roumiéu de Franço.
- **1783.** Miracle. Sant **Gènt** sauvo lou Bausset en esvartant l'encèndi qu'a pres dins lou castèu.
- **16 de Mai de 1817.** Mai de 10.000 persouno vènon gramacia lou sant à Sant-Gènt, en seguïdo d'uno plueio aboundouso tras-que necito.
- **1818.** Li bastimen que tocon lou toumbèu vènon proupieta de la *Counfrarié de Sant-Gènt* e lis autre de la coumuno de Mountèu.



*Ermitage de Sant-Gènt au Bausset
(foutò Jan-Marc Rosier)*

- **1842 :** Vesito dóu pichot **Frederi Mistral**.
- **1875.** Garisoun de l'avesque de Marsiho, touca pèr li fèbre, après qu'aguèsse begu d'aigo de la font de Sant-Gènt.
- **1884.** Agrandimen de la grand capello. Lou basti ancian es quàsi agrasa, n'en soubro que lou seitour de la coupolo.
- **1896.** Aubouron à Mountèu l'estatuo dóu sant.
- **1901.** **Roso Bordas** fai la douno à Sant-Gènt de soun bèu brassalet d'or.
- **1972.** Li relicle de sant **Gènt** revènon à la Vau-Santo. Se ié pòu vèire tambèn, dins la capello dóu toumbèu, ajassado dins uno caïso de vèire, l'estatuo de ciro dóu sant.

Lou comte di relicle se faguè en 1826.

Trouvèron : un tros dóu cran, un tros d'oumouplato, un radius, un cubitus, quàuquis os de la man, de tros de costo, tres carbo (vertèbro) de l'esquino, tres loubàri, lou sacrum, dous os de la cueïssos, uno pèiro dóu geinouï, un os de la cambo, un perouniéu, d'os dóu pèd e àutri mous-sèu, e un paquetoun de poudro d'os.

Lou roumavage de Sant-Gènt

La legèndo dis que li proumié de veni ounoura sant **Gènt** fuguèron de pastre mena pèr uno nivo de fiò.

Après, venguèron li Mountelen mena pèr lou loup que **Gènt**, à soun segound despart, avié leïssa à Mountèu. Avié senti la mort de soun mèstre. Souleto, li campano sounèron lou clar. Fuguè lou proumié roumavage e proumeteguèron de veni chasque an.

Li proumié temouniage segur dóu roumavage daton pamens dóu siècle 15^{en}.

La Revoulucioun noun l'aplantè. Mai en 1793, fuguè discrèt. Li roumiéu pourtèron sant **Gènt** dins uno sacco e, de retour, la finiguèron de rempli emé de branco de bouïs e de lausié. Quouro fuguèron en fàci dis Esclavau, au lié dóu sant, li revoulu-

ciounàri lis arrestèron e, ié bracant lou fusiéu sus lou pitre diguèron :

- *Dequé pourtas dins aquéu sa, fasès vèire o sias mort!*

- *Espinchas bèn, tenès, ié respoudeguèron li pourtaire, es uno pouncho d'araire.. e avisas-vous que soun lusènt vous esbrihaude pas, car ié veirias plus.*

- *D'abord qu'es sant Gènt que pourtas, ié venguèron, passas vostre camin.*

E countunièron, bèn tranquile.

Sant Gènt, qu'es reputa de gari li fèbre e de faire veni la plueio, es festeja lou dissate e lou dimenche que seguisson lou 16 de Mai à Mountèu e lou proumié dissate de Setèmbre au Bausset.

La Fèsto de sant Gènt à Moutèu

Vaqui, chasque an, lou debana de la fèsto de Mai que se debano à Moutèu :

D'abord, vue jouine meritous, de 12 à 20 an, soun chausi pèr la *Counfrarié de Sant-Gènt* pèr faire li pourtaire. Ié dison li *Sant-Genaire*.

Lou dissate, 6 dintre éli, vers li 6 ouro de vèspre, parton de Moutèu pèr se gandi sus lou camin de l'Ermitage. Li dous mai jouine (de-fes soun 4, de 12 à 14 an), pourtaire de la bandiero (uno longo crous), precedi d'un cavalié, duerbon lou courtège.

Darrié vènon li quatre pourtaire dóu sant (qu'an de 16 à 18 an). Soun vesti de blanc e de jaune, coulour pountificalo, emé de braio courto, guèto, camiso blanco e foulard à pastiho blanco. An de bricolo de cuer pèr lis ajuda teni lou brancan dóu sant. Soun tambèn precedi d'un cavalié.

Après un tèms de chaumo à Sant-Deidié, soun tóuti aculi vers 9 ouro de sèr à l'Ermitage, moun-te assiston au salut dóu sant sacramen.

Lou dimenche matin, d'ouro, tambèn precedi d'un cavalié, parton à soun tour de Moutèu li dous pourtaire de la crous dóu *Criste* (an de 18 à 20 an) e lou mounde emé li roumiéu se retrovon à la Vau-Santo pèr la messo e la veneracioun di relicte.

Après dina, tout lou courtège di pourtaire s'entorno à Moutèu, segui, coume pèr veni, de touto uno sequèlo de jardiniero emé, dedins, lou conse e lou curat de Moutèu e peréu lou president de la *Counfrarié*. Lou vouiage, coume pèr ana, se fai à la courso, pèr ramenta la fugido dóu sant o sa maire se rounsant à sa cerco. Aquéu biais de faire dato de 1673, tout just après la creacioun de la *Counfrarié*. L'arrivado, au crid de «*Vivo sant Gènt*» e dins l'estrambord poupulàri, se fai vers 6 ouro de vèspre à la capello Nosto-Damo de Gràci, crous dóu *Criste* en tèsto, pièi, la bandiero, dous cavalié au galop, li jardiniero, e l'estatuo dóu sant.



Li Sant-Genaire en routo vers l'Ermitage (foutò B.D.)

La journado s'acabo en proucessioun vers la glèiso moun-te se dira lou panegiri dóu sant en prouvençau. Lou tout s'acabo enfin à 10 ouro de sèr pèr un fiò d'artifice à l'entour de l'estatuo flou-rido dóu Pourtau Nòu e lou cantico :

*A l'ounour de sant Gènt,
Canten tóuteis ensèn
Aquest piòus cantico,
Que countèn sèns façoun
L'istòri magnifico
De sei sànteis acioun.*

Es la musico d'aquéu cantico que **Gounod** utilisè dins soun opera *Mireille*.

Lou dilun de matin enfin, messo, pièi vesito au çamentèri au memouriau di *Sant-Genaire* defunta e recepcioun en coumuno.

Un sant canounisa pèr lou Pople

Pèr lou roumavage de Setèmbre, vaqui ço que n'en dis **Mistral**, que, quand avié 12 an, sa maire lou mené à Sant-Gènt pèr lou gari di fèbre :

«*Lou segound cop que se ié vai, es au mes de Setèmbre... Ai gaire vist de fogo entouasiato coume aqui. En estènt que sant Gènt noun es esta canounisa que pèr la voues dóu pople, li capelan ié vènon pau... se ié vèi, de-fes que i'a, jusqu'à 20.000 pelerin. Sant Gènt, dis la tradicioun, couchavo la tèsto en bas, li cambo en aut, dins un lié de pèiro; e tóuti li roumiéu, devoutamen e gaiamen, van faire l'aubre-dre dins lou lié de Sant-Gènt qu'es uno pielo drecho, sènso eiceta li femo, que se ié tènnon sarra, de l'uno à l'autro, si coutihoun.... Anerian, emé ma maire, vèire la font dóu loup e la font de la vaco, e pièi, enviroinado de quàuqui vièi nòuguié, la capello de Sant-Gènt, ounte i'a soun toubèu, e lou roucas afrous, coume dis lou cantico, d'ounte pèr li febrous sort l'aigo miraclouso*».

Es-ti pas bello, fin finalo, l'istòri de sant Gènt? Avès de fèbre, esperas la plueio? Zòu! sigués pas en chancello, courrès au Bausset, vers aquéu sant canounisa pèr lou Pople e que lou Pople a fa patroun de la Prouvenço. **B. D. ■**